

'Etsitexi

'Uka ti'aitame Watsiti kemiranakahiya

¹ Hiki ti'aitame 'Atsuheru,* piti'aitakai xeitsienituyari heimana xeitewiyari heimana 'atahuta (127) kwieyaritetsie, 'akaniyeukaitini Hiriya mirakutewatsie meta Kutsi kwieyaritsie paiti ye'atikaiti.

² 'Atsuheru kiekariya 'aixia mirekukurarutuiyarie Tsutsa mirakutewatsie 'ukaiti katini'aitakaitini.

³ Hairieka wiyaritsie ti'aitati 'ixiarari kaniuwewieni yunaiti te'aitamete memiparewie wahetsiemieme, mekanekikixiani kuyaxi wa'ukiyarima Peritsiya kwieyaritsie kiekatari meta Meriya miemete, meta 'auriena memuti'u meta kwieyarite kepaimetu mana mirawiyatikatei meta kuwexinaruritsixi,

⁴ xeitsienituyari heimana nauka tewiyari tukari 'aye'aku, yunaime wahixie katiniwaruxeitsitiani waikawa witsiti'anenekame kemirexeiyakai meta mariwemeku kemiti'aitametikai.

⁵ Miki naiti ranuyeyaku, tawarita ti'aitame 'ixiarari kaniuwewieni, 'atahuta tukari kaniuyurieni, Tsutsa kiekariyari 'aixia mirekukurarutuiyarie memitama wahetsiemieme, waikawa memimatiwa meta waikawa memikamatiwa yunaiti. 'Iki

* **1:1 1:1** 'Atsuheru. Hepirayuki mipai pire'uxa Kerikexi het-siemieme, mikita peritsatsixi wahetsiemieme, naiti mipai pire'uxa 'iki xapayaritsie.

'ixiarari kaniuwewiyani paratsiyu hixiapapaiti
mira'iteiritsietsie,

⁶ miki witsitiniyuxexeiyakaitini rinu
'ixurikiyari meuwikai tuxati meta yuyuawiti,
'ayukawiyati rinu mutuxa meta 'ixuriki
mitairaiye matia, miki karena kaunariyari hepai
pi'aneikai pirataki wewiyati tete mukawetika
witsimitiyuxexeiyatsie rawiwiyati. Mana tsiere
kanixuawekaitini 'ipari 'amipapa huruki meta
pirataki wewiyatikaiti meta takwa pakumanekai
tetexi witsimi'anene, perira teteyari meta hipati
tetexi witsimi'aneneki.

⁷ Huru tekixiyari xexuiti yiki
pitiyuxexeiyatikatei, kaxie winuyari
waikawa miraye'axe kaniukatuariwakaitini
muxuawekaiki, miki ti'aitame pitiwamikwakai
waikawa miyiwekaiki.

⁸ Yunaiti teiteri memuta'inierie meka-
nipitiariekaitini tsepa kememiteheu'iku,
nawayamete mipai memitehetahiawarieki
ti'aitame niukieyaki mekanikatu'akaitini
kepaime memeuyehiakai.

⁹ 'Uka ti'aitame Watsiti yuhetsiemimeta
'ixiarari kaniuwewieni 'ukarawetsixi wahet-
siemieme ti'aitame 'Atsuheru paratsiyuyata.

¹⁰ 'Atahuta tukaritsie, winuki ti'aitame
'Atsuheru kwinimieme katiniyutemaw-
iekaitini, mipai katiniwaruta'aitiani 'atahuta
memite'i'uximayatsiriekai† —Mehumani, Witsita,
Kaxiwuna, Wihita, 'Awakita, Tsetaxi meta
Kaxikatsi—

† **1:10 1:10** Hepirayuki 'eunuku. Panuyine ti'uximayatame ti'aitame
hetsiemieme meta mikaneike.

11 hixiena mekehewitinike 'uka ti'aitame 'anakuruname, 'auriena makaniki witsitiyuxex-eiyati memiwaxeinyaniki teiteri meta te'aitamete, miki yemeki witsitini'imarikaitini.

12 Peru kepauka te'uximayatamete 'uka mipai memite'utahiawixi ti'aitame kemitiwareta'aitiakai, peru 'uka ti'aitame pika'uyuwairi miyemieki hetsiana. Ti'aitame 'ana matsi waikawa kaniuyeha'ani.

13 Yapauka ti'aitame temaiwawemete kaniwarutakwewieni 'iniari niukiyari memakumate, 'ana mipai tiniyiximekaitini kepauka ti'aitame 'aixia mitiyurieni, miki kaniwaruti'iwawiyakaitini temaiwawemete.

14 'Ahurawa memuti'ukai mekanihikitikaitini: Kaxitsena, Tsetaxi, 'Arimata, Taritsi, Meretsi, Maritsena meta Memukani, 'atahutati te'uximayatamete Peritsiya meta Meriya kiekatari mekanipitiariekaitini ti'aitame hamatia memitekuxataniki meta miki meteni'uximayakaitini ti'aitame hetsiemieme waikawa mira'aitsietsie.

15 Ti'aitame mipai katiniwaruta'iwawiya:

—Ke'iyurieni 'uka ti'aitame Watsiti ti'aitame te'uximayatsiriwamete mikawaranu'eniki ti'aitame tiwa'aitiakaku, 'iniari niukiyari kehaine?

16 Ti'aitame hixie meta 'iparewiwametemama, Memukani mipai kaniutayini:

—'Uka ti'aitame Watsiti 'eki ti'aitame xeikia 'axapikamatsi'uyuri, matsita yunaima 'ahetsia memite'uximaya meta kwieyarite keyupaimeti 'ena memite'awiya.

17 Yunaiti 'ukarawetsixi mipai mekateneti-maikuni 'uka ti'aitame kemitiuka'iyari, 'ana yikinama mekaniwatinanaimakuni, mipai me'utiyuati: "Ti'aitame 'Atsuheru katiniutani'ani 'uka ti'aitame Watsiti hetsiana munuaniki, peru miki pikahenu'eni".

18 Kepauka 'ukirawetsixi wa'itama Peritsiya meta Meriya kiekatari memitehetimani 'uka ti'aitame kemitiuka'iyari, yax-eikia mekateniwa'eiyakuni 'ahetsia memiteta'uximayata. Peru miki pikareuyunuani tenanaimarieti.

19 »Tamitsi xika matsikunanakeni, xapa pemitawewieni mana miraka'utsieni xewiti pikayiweni mipataniki Peritsiya meta Meriya 'iniori niukiyari kemire'uxa: kename 'ahixie ti'aitame 'Atsuheru hatsuaku Watsiti kaheyuhekiatani, meta 'uka ti'aitame kemitihiiritiariakai xewiti pita ke'anukakeni matsi 'aixia tiuka'iyariti.

20 Mipai miki xapa kepauka memeitimani hakewapaiti temeuye'atika, yunaiti 'ukarawetsixi yikinama 'aixia mekateniwaxeyiakakuni, tsepa memimamariwawe meta tsepa memikamamariwawe».

21 Ti'aitame meta hetsiana memite'uximaya miki 'ixatsi kaniwarunake, mipai katiniuyurieni Memukani kemainekai,

22 xapa kaneutani'axiani naitсарie kwie keyeumetsie miti'aitakai, keyupaimetu mana memite'awiyakai wa'utiarikaki, kiekari kemitiukumanekai waniukiki raye'utikaime, mipai tiwarahaweti waniukiki kiekari

mukumanetíkatsie yuxexuiti 'ukitsi yu'itama
yutíiriyama meketewareu'aitiaka.

2

'Etsitexi 'uka ti'aitameki kemíranayexeiyarie

¹ Míixa tukari 'anukayaku, ti'aitame 'Atsuheru
'uhaxíapieka, kanaye'erieni Watsiti kemiyuriekai
meta kemítiuyuriekai kemítiuxatsiekai hetsiena
mieme.

² Hiki teparewiwamete te'uximayatamete
mípai mekaniutiuyuani: «Meke'utiwawieni naitsarie
'ímarixi witsimemite'ímaritíka ti'aitametsie
mieme.

³ Ti'aitame kiekari mukumanetíkatsie
kewaru'uitiani memíwatiwauniki, 'ukari
witsimemite'ímarixi memíwakuxeirieniki,
Tsutsa kiekariyaritsie 'ukarawetsixi wakiita.
Miki Kekahi meke'uhiritiani míwa'íwiyaniki,
ti'uximayatame mikaneike* ti'aitame
hetsiemieme 'ukarawetsixi wahíwemeki
ti'aitame hetsia miemete, kewaruti'uayemani
witsimemiteyuxexeiyaniki.

⁴ Ketíuta'aita Watsiti hetsiemieme 'uka ti'aitame
kemi'ane matsi waikawa minake». Miki niuki
kaninakire ti'aitame, mípai katiniuta'aita.

⁵ Tsutsa kiekariyaritsie niukateitini xewiti
huriyu tewiyari Wenikamini nuiwarieya
hetsiemieme, Maxirukéyu titewatí Yahixi nu'aya,
Tsimi teukarieya, Kihitsi tutsieya,

⁶ muwiyariekai Kerutsareme míyehanie
kepauka Nawukurunutsuxi, Wawiruniya

* **2:3 2:3** Hepirayuki 'eunuku. *Panuyíne ti'uximayatame ti'aitame
hetsiemieme meta mikaneike.*

kwieyaritsie ti'aitame, Kekuniyaxi mehatsie, Kura kwieyaritsie ti'aitame.

⁷ Maxirukeyu yutatatsi niweya kanex-eiyakaitini Karatsa titewakame. Miki 'iimari 'Etsitexi kaita kanimatiwakaitini, kanitaw-eriyakaitini kaninutuitikaitini paapaya maamaya mekaniukumawerekaitini, witsitini'imarikaitini witsitiniyuxexeiyakaitini. Paapamama me'ukwiku, Maxirukeyu kanitaweriya yuniwe kanayeitiakaitini.

⁸ Kepauka mukuxaxatsiwakai xapa ti'aitame kemainekai, yumiireti 'ukari mekaniukuxeiriyani Tsutsa kiekariyaritsie Kekahi kaniwa'iwiyakaitini. 'Etsitexi meta kanewitikieni ti'aitame paratsiyuyata, Kekahi kaniyetuiriyarieni, mana miki 'ukari 'iimarixi wakii kanihiritiariiekaitini.

⁹ 'Etsitexi Kekahi 'aixia katinixeiyakaitini. 'Ayumieme mikiki kaniuyukumexiitiani witsimitiyuxexeianiki 'uayete katinimikwakaitini meta 'ikwai 'aixia ti'anenekame. Kaniwaranuye-hapani 'atahuta 'ukari memita'iwiyaniki mete'i'uximayatsirieti, paratsiyuta 'iimarixi 'aixia memi'anene, meta muyekukutsuni 'aixia tiuye'anekame kaniuxatiarieni 'ukarawetsixi wakiita.

¹⁰ 'Etsitexi pikayutaxa hakewa mekiekametikai meta yu'ukiyarima, Maxirukeyu me'imaiyakaiki.

¹¹ Maxirukeyu yakatiniutiyeikakaitini hareni hixie, timaimiti 'Etsitexi kemiraka'iyuniwakai meta kememite'ixeiyakai.

¹² Hiki ti'aitame 'Atsuheru hetsia meutahaniki, tamamata heimana huta metseri kaniyurimiki

'aixia yuyurieti kemire'uxa: 'ataxewime metseri mixaxi hatseitiyariki meta 'ataxewime metseri witsimu'iatikaki kaniyu'uayemakamiki.

¹³ Miki naime raye'atame, 'uka ti'aitame hixie kaniyuheki'atamiki, kaniyiwemiki hareni timieme mirepini paratsiyupaiti, tita mireuyehiaka.

¹⁴ Yiwikita neta'axekaitini paratsiyuta, ximeri kani'axekaitini Tsatsikaxi 'i'iwiyakaku, ti'uximayatame ti'aitame tuxexerimama wa'iwiyame. Pikayuheki'atakai ti'aitame hixie, 'itihiwe'erieniki titani'airieniki.

¹⁵ Kepauka 'Etsitexi 'Awikahiri niweya, Maxirukuyu mitaweriyaxi yutatatsi niweya, kanaye'ani muyuheki'ataki ti'aitame hixie, miki Kekahi ti'aitame hetsiemieme 'ukarawetsixi wa'iwiyame tita mitiwaxatiakai tixaiti pikatiuta'iwau. 'Ana yunaiti mekanihixiyakaitini me'ixeyati.

¹⁶ 'Anari 'Etsitexi kanewitiki'eni paratsiyuta, ti'aitame 'Atsuheru hixie, tamamata metseritsie, tewe metseriyaritsie, 'atahutarieka wiyaritsie ti'aitakaku.

¹⁷ Ti'aitame 'Etsitexi kaniutihiwe'erieni kehipame 'iimarixi, miki 'aixia katiniuxeiya keyuri hipame 'ukari. Hiki kuruna kanenamanirieni 'uka ti'aitame kanayeitiani Watsiti hetsiemieme.

¹⁸ Ti'aitame 'ixiarari kaniuwewieni 'Etsitexi hetsiemieme meta yunaiti memiparewiekai mete'i'uximayatsirieti wahetsiemieme. Mipai katiniwaruta'aitiani kwieyarite mamanetikatsie, 'ixiarari memukuwewiexianiki xeitukari, 'imikierite katineutani'axiani naitsarie 'aixia 'anemeki.

'Atsuheru kemitiuta'uniwaxi

19 Mexi meyuxeiriekai hutarieka miemete 'ukari, Maxirukeyu ti'aitame kitenie kaniutakateitini.

20 'Etsitexi yaxeikia 'atsikapainekai kemi'ane memipaapamamatikai meta hakewa mekiekametikai, Maxirukeyu kemirehiawekai, yaxeikia Maxirukeyu kaneku'eniekaitini meripai hepai kepauka 'iweriyakaku kemirei'eniekai.

21 Miki tukaritsie, Maxirukeyu ti'aitame kitenie 'utakaiku, yuhutati mekaniuyeha'ani ti'aitame parewiwamete Wihitani Teretsi matia ti'aitame hetsia miemete, memite'iwiymemetetikai, mipai mekaniutyuani kename ti'aitame 'Atsuheru memieni.

22 Maxirukeyu retimaika kemitiuxatsie, 'uka ti'aitame 'Etsitexi mipai katiniutahiawe, mikita ti'aitame mipai katiniutahiawe Maxirukeyu het-siemieme.

23 Kepauka mitiuti'iwauritixi miki, mipai mekatenetimani kename tiyuritikai, yuhutati ti'aitame te'uximayatsiriwamete kiyetsie mekanikaxuiyaxiani. 'Iki naiti katinaka'utsieni kepauka miraka'utiarietsie ti'aitame hixie.

3

'Amani huriyutsixi kemitiwaraye'uniekai

1 Miyatiuyikukeri ti'aitame 'Atsuheru 'Amani waikawa mariweme kanayeitiani Hamerata nu'aya, 'Akaki nuiwarieya, kanipitiani hetsiana miti'uximayakaki matsi waikawa katinipitiani keyuri hipame.

2 Yunaiti te'uximayatamete paratsiyu kitenie miemete ti'aitame muwayekatsie, mekaniukatunuma'uwekaitini 'Amani hixie, mariweme mekanayeitiwakaitini, ti'aitame mipai mitiu'aitakaiki. Peru Maxirukeyu hixiena pika'ukatunumakiekakai meta mariweme pika'eriekai.

3 Hiki paratsiyuta memite'uximaya ti'aitame kitenie memihiritiariekai, Maxirukeyu mipai mekateniuta'iwawiya: «¿Titayari ti'aitame kemaine yapekatikamie?»

4 Tukari meukayunetsie mekanitate'akaitini miixa. Peru miki pikawa'eniekai. 'Ayumieme mekanitaxata 'Amani hetsia mixeiyaiki Maxirukeyu kemiyianekai, mikiri kaniyutax-atakaitini kename huriyu tewiyaritikai.

5 Kepauka 'Amani Maxirukeyu muxei hixiena mika'ukatunumakiekakaiki meta mariweme mika'eriekaiki kaniuyeha'ani.

6 Kepauka 'Amani miretima Maxirukeyu hakewa mekiekametikai, katiniuhayewa yuxaitame 'imienike kanitiwauni yunaima Maxirukeyu teiterimama wahetsia, tatsuari huriyutsixi 'Atsuheru mira'aitakaitsie memitamakai.

7 Hiki mexiakame metseriyaritsie *nitsahani* tamamata heimana huta wiyari 'Atsuheru ti'aitakaku, mekaniuyuta'iwa 'Amani hixie, yamemitehetimaniki kemi'ane metseritsie meta tukaritsie mitinake, huriyutisixi memikwi'iwaki. Hiki 'iniari memuwewi katinikanake tamamata heimana huta, 'araxi metseriyaritsie.

⁸ Hikì 'Amani ti'aitame 'Atsuheru mipai katiniutahiawe:

—'Ena mepuxuawe hipati teiteri nait-sarie metaxirieti kiekari mukumanetsie watsata pemira'aitatsie, 'iniari niukiyari kememitehexeiya kememite'uhu yiki pi'ane, hipati kememiteheixeiya. Yamepikatekahu 'iniari niukiyaritsie kepemiti'aita, 'aixia pika'ane memu'uwani me'ayeneniereti.

⁹ Xika matsinakeni xapa keneutawewi raka'ukame memikwi'iwaki, ne nekaniyetuamiki te'uximayatamete wahixie haika tsienituyari heimana xeitewiyari heimana tamamata miriyari (330.000) kiruyari pirata, tumini miwati'utsiwa miyuhayewaki.

¹⁰ Hikì ti'aitame hanira tseyuyari yumamatsie 'anutihinaka 'Amani kaniu'itiani Hamerata nu'aya, 'Akaki nuiwarieya meta huriyutsixi miwaraye'unie.

¹¹ Ti'aitame 'Amani mipai katiniutahiawe:

—'Atumini kena'iti kemimatinake yakeni-wareyuri miki teiteri.

¹² Mexiakame metseritsie tamamata heimana hairieka tukaritsie mekaniuta'inierieni te'utiwamete ti'aitame hetsia memite'uximaya. Mekatenaka'utiani kiekari mukumane wa'utiarikaki meta waniukiki kemitiwa'aitiakai, 'Amani ti'aitame mitiwa'aitiakai kwie mukumanetsie te'uximayatamete yiki memite'uniuka muwa memite'uximayakai kuwexinaruritsixi meta wa'ukiyarima. Naiti katinaka'utsieni kename ti'aitame 'Atsuheru haine, meta kanititseyumani ti'aitame hanirayaki.

¹³ Hikì xapa me'utiwewieka tupiritsixi mekaniwareutani'axiani, kwie mukumanetsie mipai mekateniwaruni'ani memiwakwiniki yunaime huriyutsixi temari, 'ukirawetsixi, 'ukarawetsixi, tñiri meta wapiini memitewanawairieniki xeitukaritsie, tamamata hairieka tukaritsie tamamata heimana hutarieka metseritsie, tatsiari 'araxi metseriyaritsie.

¹⁴ Kwie mukumanetikatsie 'iniari niukiyari 'ikiyari mepexeyatikani, mipai memiteyukuxaxatiwaniki memiyukuha'aritiwaniki miki tukaritsie.

¹⁵ Hikì tupiritsixi mekaneutayeixiani ti'aitame yatiwaruta'aitaku, meta tsiere miki xapa kaniutaxatsieni Tsutsa kiekariyaritsie. Hikì ti'aitame 'Amani hamatia me'anukayaxeka mekananu'ieni, mexi Tsutsa kiekariyaritsie mekayumaiwawekai.

4

Maxirukeyu 'Etsitexi matia kememite'utaxataxi

¹ Kepauka Maxirukeyu miretima kemitiutainekai, yukamixa kaneukatsana, hiwerika kamixayari kananakatini meta naxi kaniuyukawiwirieni, kiekaritsie kaniuyeikakaitini karima 'utatsuati.

² Paratsiyuta mepikapititiekai hiwerika kamixayari me'anakatitikaiti, ti'aitame kitenie xeikia kaniye'axekaitini.

³ Naitsarie mira'aitakaitsie kiekaritetsie, mana waikawa huriyutsixi mekaniyuhakiekaitini mete'uka'eniwati me'utitsuati. Miki yuwaikwati hiwerika kamixayari me'anakatitikaiti, naxipa mekanitihipitekaitini.

4 Kepauka 'uka ti'aitame 'Etsitexi h̄wemete 'ukari meta ti'aitame te'uximayatsiriwamete memu'axia mekatenitaxatiani kem̄itiutainekai, miki waikawa kaniuyukahiwerieni, hiki Maxirukeyu kamixate katineni'airieni menakatiniki hiwerika kamixayari mika'anakatikinikiri, peru miki pika'itanaki'eri.

5 Hiki 'Etsitexi Hataki katiniutani'airieni, ti'aitame ti'uximayatsiriwame ti'aitame hetsiemieme mikeriekai mi'iwiyaniki, mipai katinita'aitiani meti'iwauniki Maxirukeyu titaki mitiyu'iyaritia titayari mitiyuhiwerie.

6 Hiki Hataki Maxirukeyu hetsia kaniye'ani, kiekaritsie kaniuyeikakaitini te'iteri memayutix-exeiriwatsie, ti'aitame kitenie hixie.

7 Maxirukeyu katinitaxatiani kem̄iranuyeyakai, meta kanitaxatiani kepa'imeme 'Amani tumini miyetuakai tumini h̄weme hetsia huriyutsixi memikwi'iwaki.

8 Kanihiritiani tsiere xapa Tsutsa kiekariyaritsie miyetuiya 'ikiyarieya, miki miti'aitakai memikwi'iwaki, miki 'Etsitexi meixeitsitianiki, mireitaxatianiki, meitatieeniki ti'aitame hixie mitakeniki mitawawirieniki yute'iterima wahetsie mitanuaniki.

9 Hiki Hataki kanakunuani 'Etsitexi katiniutaxatiani Maxirukeyu kem̄ainekai.

10 Hiki 'Etsitexi Hataki mipai katiniuta'aitiani Maxirukeyu mipai miretahiaweki:

11 «Yunaiti ti'aitame hetsia te'uximayatamete meta kiekari mukumanetikatsie mipai mep̄temate, tsepa kem̄i'ane 'uki 'uka, ti'aitame ka'ita'inieyu, h̄xiena miye'ani takwa 'upaiti miyematsie, xei'in̄iariyari xeikia kanixuaweni:

Xika heutahani kanimieriemiki xeimieme. Kaniupitiariemiki xeikia ti'aitame xika huru 'itsiyari ratserieni 'atukariki pimareuyehiwirieni. Ne xeitewiyari heimana tamamata tukari panukamie ti'aitame pikaneretani'airiewe hixiena nemitakeniki».

¹² Kepauka miretima Maxirukeyu 'Etsitexi ke-mainekai,

¹³ hiki mipai katinini'airieni: «Mipai pepikareku'eriwani, 'eki xeikia ti'aitame kiita pemayekaki xeikia pepitawikweni yunaime huriyutsixi watsata.

¹⁴ Xika 'eki kayuwati petiuyerini, xaitsiepita kanayenemiki tatsixiname huriyutsixi, peru 'eki meta 'apaapa 'iwamama mekanikwikuni yunaiti. Xiari yaki 'uwenitsie pepikanua xiari mipai temite'anuyekinekekaiki pepanukake».

¹⁵ 'Etsitexi Maxirukeyu mipai katineni'airieni 'iku'eiyati:

¹⁶ «Kenemieka mipai ketineyuri keniwarekuxeiri yunaime huriyutsixi Tsutsa kiekatari, para memeyuhakieniki nehetsiemieme. Haika tukari xepikatehekwaka xepikahehareka tukariki meta tikariki. Neta nepinehakieni neparewiwamete teyunaiti xehepai. Kepauka nemiraye'atiani, ti'aitame hixie nepitakeni, tsepa 'iniari mikahaine hepai. Xika ne'umierieni, tsepa neketiumierie».

¹⁷ Hiki Maxirukeyu heyaka yakatinikayani 'Etsitexi kemitita'aitiakai.

5

'Etsitexi 'Atsuheru kemitutawawiri

¹ Hairieka tukaritsie, 'Etsitexi 'iwi 'amitewi witsimi'ane 'anakatika kaneyani paratsiyu kite-nie kwitiwa takwa mukumatsie, ti'aitame hixie. Ti'aitame muwa kanakateitini yu'uwenitsie, kite-nie heuyeniereti.

² Kepauka 'uka ti'aitame 'Etsitexi muxei takwa 'uwekame, 'aixia 'anemekı kanixeiya huru 'itsiyari kanitserieni. Hiki 'Etsitexi 'aniuyani huru 'itsiyari kaniumayiani.

³ Hiki Ti'aitame mipai katinita'iwawiya:

—¿Ketita perayexeiya, 'uka ti'aitame 'Etsitexi? ¿Ketita pera'iwawa? Tsepa nemıra'aita kemiyewa hixiapa 'akame nepımatsiyetuiriewe.

⁴ 'Etsitexi mipai katinita'eiya:

—Xıka matsinakeni ti'aitame, kenemie hiki taikaiyaritsie 'ixiarari 'ahetsiemieme nepewewieni meta 'Amani kena'inieti.

⁵ Hiki Ti'aitame mipai katiniuta'aita:

—Xeiya 'Amani xekenewitiyu 'Etsitexi temite'aye'atiirieniki kaniutayini.

Hiki ti'aitame meta 'Amani mekanekine 'ixiararipa 'Etsitexi miwareta'iniekaiki.

⁶ Kepaukari me'ietı ti'aitame tawarita, 'Etsitexi kaniuta'iwawiya:

—Yakenetineutahiawi tita pereuyehiwa nepımatsiyetuirieni. ¿Tita pera'iwawa? Tsepa kwie nemıra'aita kemiyewa hixiapa 'akame nepımatsiyetuiriewe.

⁷ 'Etsitexi mipai katinita'eiya:

—Nemireuyehiwa meta nemıra'iwawa kanihikıtini,

⁸ xıka 'aixia penetimaika, xıka matsinakeni pemıraye'atiani nemireuyehiwa meta

nemira'iwawa, 'uxa'a pekanayenemiki 'Amani matia 'ixiarari nemixewewirienitsie, 'anake yanekatinixetahiawimiki.

'Amani Maxirukeyu kemitiutixani'eri

⁹ Miki tukaritsie 'Amani kwinimieme tiyutemawieti newayeyani 'aixia tiku'eriwati, peru kepauka Maxirukeyu muxei ti'aitame kitenie hixiena pika'anukuke meta nitima pika'uyiyiakakai, waikawa kaniuyeha'ani hetsiena mieme.

¹⁰ Peru 'uyinitiaka yukie kaneyani.

'Amani yuhamikuma kaniwaruta'inieni meta yu'ia Tseretsi,

¹¹ katiniwarutaxatiani kemitixikutikai meta niwemama kememiyupaimekai, ti'aitame kemitixeyakai kemitinaki'eriekai naimeki kemirenukake ti'aitame hetsia te'uximayatamete waheimapai mikaweniki.

¹² Tawarita 'Amani mipai kaniutayini:

—Matsi ne xeikia nekanihikitini 'uka ti'aitame 'Etsitexi muta'ini 'ixiararipa ti'aitame mewewiritsie. Metatsiere 'uxa'a kaneneta'inieni nemeiteitaki.

¹³ Peru naiti miki ne nehapaitsita tixaiti pikatihiki, huriyu Maxirukeyu nemixeyaki kuxi ti'aitame kitenie.

¹⁴ 'Iyaya Tseretsi meta yunaiti hamikumama mipai metenitahiawe:

—Kiye 'anuyemitsime keneuta'aita huta tewi-yari heimana tamamata tsikuriyari 'utewime, ximerita ti'aitame keneutawawiri Maxirukeyu mana mikaxuiyaniki. Mipai 'aixia 'iyari pekan-imieni 'ixiararipa ti'aitame matia.

'Amani kemitiutahiawarie kaninake,
katiniuta'aita kiye 'anuyemitsiti mikakerieniki.

6

Maxirukeyu kemitiutemawieritarie

¹ Hiki ti'aitame miki tikaritsie pikakuwekai,
'ana katiniutani'ani kemitiuyi xapayari
muhuriyamieki, kepauka miti'aitakaitsie mieme
makateriwarieniki.

² Mana mipai tineuku'ukaitini kename
Maxirukeyu Wihitani meta Teretsi mame
warutaxataakai ti'aitame hiwemetemama, mipai
memitekuxatakaiki kename ti'aitame 'Atsuheru
memienikekai.

³ Ti'aitame mipai kaniutayini:
—¿Ke'u'itarie tita tiyetuiriyarie yu'iwarika
Maxirukeyu 'ikiki?

'Iparewiwametemama mipai mekatenita'eiya:

—Tixa'iti 'atsipikatiyuriwe hetsienamieme.

⁴ Kepauka 'Amani paratsiyu kitenie takwa
munua ti'aitame tawawirienike, Maxirukeyu
kiye muta'aitakaitsie pihetsiena miemetikai. Hiki
ti'aitame kaniuta'iwauni.

—¿Kemi'ane takwa puyeika?

⁵ 'Iparewiwamete mipai mekaniutiyuani:

—Takwa muyeika 'Amani kaniyianeni.

Ti'aitame mipai katiniuta'aita:

—Kewatayani.

⁶ Kepauka 'Amani muwataha ti'aitame mipai
katinita'iwawiya:

—¿Kehepai 'itiriwa tewi ti'aitame 'aixia
mitixeiya?

Hiki 'Amani mipai kaniutayini yuxatati:
«¿Kemi'ane tawarikuta ti'aitame 'aixia pitixeyarie
nexeikia nekanihikitini?»

⁷ 'Ayumieme mipai kaniutayini:

—Ti'aitame tewi 'aixia mitixeiya,

⁸ 'ixurikiki ketiutani'ani ti'aitame menakatikikai
meta kawayuya manutiyeixa yumu'utsie
witsiti'anenekame reukapikame.

⁹ 'Ixurikite meta kawayu ketiyetuiriyarieni
ti'aitame kemi'ane ti'uximayatame 'aixia
mitixeiya, ti'aitame tewi 'aixia mitixeiya
mititiketianiki, ke'utiyani kiekaritsie 'ehanati,
mipai tiuhiwati: “Mipai kani'it'ariwani tewi
ti'aitame 'aixia mitixeiya”.

¹⁰ Ti'aitame 'Amani mipai katiniutahiawe:

—Yapauka kenemie 'ixuriki pe'ahurieti meta
kawayu pe'ahanati yaketineuyuri kepemutayi,
Maxirukeyu huriyu tewiyari ti'aitame kitenie mu-
taka. Pepikaratitimaiyani nixeiniukiyari tima
naimeki kepemutayi yaketineuyuri.

¹¹ Hiki 'Amani 'ixuriki 'anuhurieka
meta kawayu 'anuhanaka, Maxirukeyu
katiniutikemaritiani, kawayutsie 'anakaime
kiekaritsie 'ehanati kaniuyeikakaitini, mipai
'utaiti: «Mipai kani'it'ariwani tewi ti'aitame 'aixia
mitixeiya».

¹² Maxirukeyu kaninuani ti'aitame paratsiyu
kitenie, 'Amani yukieta kanakunuani
yumexitiat, nutuixieti heuyutinati yihixie.

¹³ Yu'iya Tseretsi meta yunaime yuhamikuma
katiniwarutaxatiani kemiranuyeyakai.

Hiki 'ixatsitamete waikawa
memitemaiwawekai meta 'iyaya Tseretsi mipai
mekatenitahiawe:

—Maxirukeyu xika pemiemi, xika huriyu tewi-
yari hikini pepikayiwexani. Kaniyuritini
'ekipita pekanimieremi.

¹⁴ Hiki mexi'akuxi metekuxataka
'Amani hamatia, mekaniu'axiani ti'aitame
te'uximayatsiriwamete mekaneiwitini mexiima
'ixiararipa 'Etsitexi meiwewiekai hetsia.

7

'Amani kemitiumierie kanenimayatsieti

¹ Ti'aitame 'Amani matia 'ixiararipa
mekanani'uka ti'aitame 'Etsitexi hetsia,

² hutarieka tukaritsie me'ietiweti tawarita
ti'aitame kanita'iwawiya:

—Kenetineutaxatia tita pereuyehiwa, 'uka
ti'aitame 'Etsitexi, ne nematietuirieni.
¿Tita pera'iwawa? Tsepa ne hixiata 'akame
nepimatsiyetuiriewe nemira'aitatsie.

³ 'Etsitexi mipai katinita'eiya:

—Xika 'aixia penetimaika ti'aitame, xika matisi-
nakeni, ne tukari nepeuyehiakaku. Nepira'iwawa
neteiterima pemiwatinenimayataki.

⁴ Ne meta neteiterima tekaniutuiyani
temeuyehiyaniki temikwi'iwaki teyu-
naiti. Xika xeikia temite'uximayakaki
te'utuiyanike, ne 'atsinepikahainenikeyu, mikiki
pikaheuyewekakeyu nemimatsi'uximatiaka
ti'aitame.

⁵ Ti'aitame 'Atsuheru mipai 'Etsitexi katini-
uta'iwawiya:

—¿Kemi'ane miki pihiki miyamitiuka'iyari
mika'uyukatewiya? ¿Hakewa peyeika?

⁶ 'Etsitexi mipai katinita'eiya:

—Mitatsi'aye'unie 'Amani kanihikitini
'axamitiuka'iyari.

'Amani waikawa kaniutimani ti'aitame hixie
meta 'uka ti'aitame hixie.

⁷ Ti'aitame kananukukeni waikawa ha'ati,
kananuyeyani makutsiiraiyetsie paratsiyuta 'ieti
tiuhayewaka. Peru 'Amani retimaika kename
ti'aitame kareiyehiwirienikekai, kaniuyuhayewa
'uka ti'aitame 'Etsitexi tawawirienike
mireiyehiwirieniki mikamierieniki.

⁸ Kepauka ti'aitame hutarieka muwa
munua 'ixiarari maxuawetsie, 'Etsitexi mexi
yu'iparitsie 'akatei 'Amani 'auriena kaniukaweni.
Miyatiuniereka, ti'aitame karima mipai
kaniutayini:

—Hiki 'akuxi matsi 'uka ti'aitame hamatia ti-
huimiki ne'ixeyakaku nekiita.

Yapauka mipai 'utayiku ti'aitame, 'Amani
yuhixie kaneutihiyani.

⁹ Kaxiwuna titewati ti'aitame
ti'uximayatsiriwame, mipai kaniutayini:

—Kiye 'Amani kie kaneweni huta tewiyari
heimana tamamata tsikuriyari 'utewiti.
Mita'aitakai Maxirukeyu hetsiemieme meripaiti
'ahetsie mutanua.

Ti'aitame mipai katiniuta'aita:

—Mana xekenekaxu'i.

¹⁰ Mipai katiniuyini 'Amani kiyetsie
kaniukawiyani Maxirukeyu hetsiemieme
mita'aitakai. Mipai katiniuhaxiapieni ti'aitame
miha'akai.

8

Xapa huriyutsixi wahetsiemieme

¹ Miki tukaritsie ti'aitame 'Atsuheru 'uka ti'aitame 'Etsitexi 'Amani tipiinieya katiniyetuirieni, huriyutsixi miwaraye'uniekai. Maxirukeyu ti'aitame hixie kaninuani, 'Etsitexi titaxatiaku kename marieyatikai.

² Ti'aitame yutseyu hanirayari kananutihina, 'Amani mekamakai, Maxirukeyu kaniu'itiani. 'Etsitexi 'Amani mira'aitakaitsie Maxirukeyu pita katiniuhiritiani meta piiniteya.

³ Hiki tawarita 'Etsitexi ti'aitame hetsia kaniye'ani. Hixiena kanatiweni 'utatsuati, kanitawawirieni 'Amani 'Akaki nuiwarieya huriyutsixi kemitiwaru'aitaxi yamikatiyiniki.

⁴ Ti'aitame huru 'itsiyari 'Etsitexi kaniutserieni. Hiki 'anukukeka ti'aitame hixie,

⁵ mipai kaniutayini:

—Xika 'aixia penetimaika, xika 'aixia 'aneni keneyutemawieka nehamatia, mipai ketineu'aita mikahaye'atarieniki huriyutsixi memikwi'iwakekai pemira'aitatsie naitsarie, 'Amani miti'utia Hamerata nu'aya, 'Akaki nuiwarieya.

⁶ Ne yanepikara'eriwakai memite'uka'eniwanikekai neteiterima. Nepikaheunierimikikai neteiterima memikwi'iwakekaitsie.

⁷ Ti'aitame 'Atsuheru 'uka ti'aitame 'Etsitexi meta huriyu tewiyari Maxirukeyu, mipai katiniwarutahiawe:

—'Amani huriyutsixi miya miwaruyuriki 'ayumieme 'Etsitexi nepitiupitia piiniteya, mikita kiyetsie pukawiya.

8 Hikita xapa xekeneutawewi, ne kename nehaine, huriyutsixi wahetsiemieme kemixetinake, xekeneutseyuma ne nehaniraki. Xapatsie raka'utiariekame kename ne nehaine meta tseyumariekame nehaniraki, 'anari xewiti mikupatani pikayiwani.

9 Yapauka te'utiwamete ti'aitame hetsia miemete mekaniuta'inierieni. Hairieka metseritsie xeitewiyari heimana haika tukariyaritsie, *tsiwani* metseriyaritsie mekaniyuakaitini. Tinaka'utsieni naime Maxirukeyu huriyutsixi kemitwaru'aita, kuwexinaruritsixi meta memite'aitarie xeitsienituyari heimana xeitewiyari heimana 'atahuta kwieyaritsie memitamakai, Hiriya meta Kutsi meye'atikaiti. Miki 'aitsika kaniuti'utiarieni xexuiti kwieyarite mukumanetsie kememite'u'utiwakai meta kememite'uniukakai huriyutsixi waniukiki.

10 Maxirukeyu 'aitsika naka'utiani ti'aitame 'Atsuheru kename haine hanirayaki 'ititseyumaka, ti'aitame tupiritsiximama kaniwareutani'axiani naitсарie, kawayutsixi kurarutana miemete kwinimieme memayiwawe wahetsie me'utekame.

11 Ti'aitame niukieya huriyutsixi kaniwarupitiani memuyukuxerieniki meta memuyukihianiki kemi'ane memiwatakwini, para memiwakwiniki tsepa kemi'ane kwieyaritsie kiekatari xika mewakwikuni wa'itama, watiiriyama meta wapiinite yupiinite memite'ayeitianiki.

12 Mipai memiteyurieniki naime kiekari mukumanetsie 'Atsuheru mira'aitakaitsie, huriyutsixi mekanitipini tamamata heimana haika tukari-

yaritsie, 'araxi metseriyaritsie.

¹³ Miki xapa 'ikiyaya naitsarie kwie mukumanetsie kaniyuhayewaxiamiki, yunaiti mekete'utamarieni kiekari mukumanetsie. Huriyutsixi memuyuha'aritiakaki miki tukariyaritsie memiwaraye'unie memiwatakwiniki.

¹⁴ Tupiritsiximama, ti'aitame yatiwa'aitiakaku, yapauka mekanayekine kawayutsixi kwinimieme memayiawawe wahetsie me'uteti. Miki xapa kanikuxaxatsiwakaitini yaxeikiata Tsutsa kiekariteyaritsie.

¹⁵ Maxirukeyu kaniwayeyani ti'aitame hixie 'aixia rekemariti muyuawi, mutuxa meta huru kurunayari 'ayeukame 'anamatì, meta rinu 'ixurikiyari tairaiyeme 'anatatiti. Tsutsa kiekariyaritsie mekaniutihiwakaitini meyutemamawieti.

¹⁶ Huriyutsixi wahetsiemime miki pihekariyatikai meta temawierika tukariyari patia, memutihiwaniki 'aixia 'anemekì.

¹⁷ Xexuime kwieyaritsie meta kiekarite mukumanetsie hakewa xapate meye'axekai ti'aitame niukieya, mana temawierika kanixuawekaitini mekaniyuniakaitini huriyutsixi 'ixiarari mewewieti. Meyumiireti hipame kwieyaritetsie teiteri huriyutsixi mekanayuyeitiani memamati.

9

Huriyutsixi kememite'ayu'iwaxi

¹ Ti'aitame xapaya kaniuye'axianikekaitini tamamata heimana haika tukari, tamamata heimana huta metseriyaritsie, 'araxi metseriyari mihiki. Huriyutsixi memiwaraye'unie

mekanitakwewiekaitini miki tukaritsie
memiwakwiniki, peru xapate kaniuyupataxiani
huriyutsixi mekateniwa'aitiakaitini kemi'ane
memiwakwikukai.

² 'Atsuheru mira'aita memite'awiya,
huriyutsixi mekaniyuxeirikaitini yukiekaritsie
memiwatakwiniki 'iya memiwaraye'uniekai.
Nixewiti miwatakwiniki pikayuwairiyakai yunaiti
mepimamakai.

³ Yunaiti naitsarie kwieyaritsie
te'uximayatamete meta ti'aitame parewiwamete,
kuwexinaruritsixi, huriyutsixi mekaniwa-
parewiekaitini, Maxirukeyu memakati.

⁴ Maxirukeyu 'aixia tiyurieneti kanayuyeitiani
paratsiyuta. Nikuxaxatsiwakaitini naitsarie
kwiepa waikawa mariwetu kanayeiximekaitini.

⁵ Huriyutsixi 'ixiparaki mekaniwarukwini
yunaime memiwaraye'uniekai. Mekaniwaraku-
maweriya, yamekatenuyurieni kemitiwanake
memiwaxani'eriekai wahetsiemieme.

⁶ Tsutsa kiekariteyaritsie 'auxiwime tsienitu-
yari teiteri mekaniwarukwini.

⁷ Meta mekaniukwi'iwa Paritsanirata,
Raripuni, 'Atsipata,

⁸ Purata, 'Arariyaxi, 'Arirata,

⁹ Parimatsita, 'Aritsai, 'Arirahi, meta Wahitsata,

¹⁰ tamamata memihikitikai 'Amani
niwemama Hamerata nu'aya, huriyutsixi
memiwaraye'uniekai. Peru piiniteya
mepikatehepi.

¹¹ Miki tukaritsie ti'aitame retimaika
keyupaimeti memukwi'iwaxi Tsutsa kiekarite-
yaritsie,

12 'uka ti'aitame 'Etsitexi mipai katiniutahiawe:

—Huriyutsixi 'auxiwime tsienituyari memiwarukwi, meta tamamata 'Amani niwemama Tsutsa kiekariyaritsie, matsi kiekari mamanetikatsie kememiteheyurie. Kenetineu-taxatia titapereuyehiwa, yanepitikayani. ¿Tita tawarita pereuyehiwa? Yapitiyini kepemitayini.

13 'Etsitexi mipai kaniutayini:

—Ti'aitame xika matsinakeni, huriyut-sixi Tsutsa kiekatari keniwarupitia 'uxa'ake memitetahayewaki hiki mieme kepemitiwarupitia, meta keniwarupitia tamamata 'Amani niwemama kiyexitsie memikaxuiyaxianiki.

14 Ti'aitame mipai katiniuta'aita. Tsutsa kiekariyaritsie xapa kaniyetuiyani, tamamata me'aye'ukame 'Amani niwemama kiyexitsie memikaxuiyaxianiki.

15 Huriyutsixi Tsutsa kiekatari mekani-uyukuxeirieni tamamata heimana nauka tukariyaritsie, 'araxi metseriyaritsie, 'ana mekaniwarukwini haika tsienituyari teiteri, peru wapiinite mepikatehepi.

16 Metatsiere, huriyutsixi kwie mamanetikatsie ti'aitame mira'aitatsie mekaniuyukuxeiriexiani yuhetsie memitanuaniki memiwaraye'unie wahepaitsita. Haika tewiyari heimana tamamata heimana 'auxiwi miriyari memiwaxani'eriekai mekaniwarukwini, mikita wapiinite mepikateheti.

17 Miki katiniuyini tamamata heimana haika tukariyaritsie 'araxi metseriyaritsie.

Tamamata heimana nauka tukariyaritsie mekaniuka'uxipieni, 'ixiarari mekaniuwewieni.

Purimi kememite'utiwewiwanikekai

¹⁸ Huriyutsixi Tsutsa kiekatari tamamata heimana haika tukaritsie memuyuxeiri meta tamamata heimana nauka, tamamata heimana 'auxiwiriekatsie mekaniuka'uxipieni, 'ixiarari mekaniuwewieni meyutemamawieti.

¹⁹ 'Ayumieme huriyutsixi naitsarie kiekaritsie memeutitekai kiekari 'etsimiyeyeutsie, 'ixiarari mekaniutiwewiwakaitini tamamata heimana nauka tukaritsie 'araxi metseriyaritsie, temawierika tukariyari meta 'ixiarari tukari, 'ana yunaiti mekateniyutamikwakaitini.

²⁰ Hiki Maxirukeyu 'iki naime raka'utiaka kemitiuyi, xapate kaneutani'axiani yunaime huriyutsixi wahetsia, 'ateewa paiti memetitekai wahetsia meta 'ahurawa mitiuyehanetsie 'Atsuheru mira'aitakaitsie,

²¹ mipai tiwa'aitiati xeiwiyari 'anuyeyeikakaku memitiwewiwaniki 'ixiarari tamamata heimana nauka tukaritsie meta 'auxiwirieka tukariyaritsie 'araxi metseriyaritsie,

²² 'ana memuxinarieki huriyutsixi hipati mewaraye'uniekaku kepauka wahiwerika temawierika matia, kepauka meta wakukwiniya temawierika 'ixiarariyari patia. 'Ayumieme peuyewekai memitiwewiwaniki temawierika tukariyari meta 'ixiarari, yu'ikwai meta hipame metewatamikwati, tixaiti memikatehexeiya metewakumikwati.

²³ Mipai huriyutsixi meteku'eriwati yuyeyari mekanayeitiani 'ixiarari

me'utiwewiwati mekanakine, Maxirukeyu kemitiwaraka'utsiriekai mete'aye'atiwati mepaki.

²⁴ 'Amani Hamerata nu'aya, 'Akaki nuiwarieya, huriyutsixi miwaraye'unie, naime miki katiniuyuriekaitini huriyutsixi memikwi'iwaki *puri* kaniuwewiekaitini wahetsiemieme, —tatsiari kemi'ane mirayu'iwa— miwahixiyatsitianiki miwakwiniki.

²⁵ Peru kepauka 'Etsitexi ti'aitame hixie mutaniu, miki xapatsie mipai katiniu'aita kename 'Amani kemitiu'aitaxi huriyutsixi wahetsiemieme hetsiena tinakekekai, miki meta niwemama kiyetsie mekekaxuiyaxianike.

²⁶ Mipai tiuyiku miki tukaritsie katini-uteriwarieni *Purimi*, *puri* hetsie 'ayehaniekame. Kemireku'uxa xapatsie, kememite'unenierixi kememite'anuyeki,

²⁷ hiki huriyutsixi mekanuiyu'enieni yuhetsiemieme meta yuniwema wahetsiemieme, para yunaiti meyuxewiti memitiwewiwaniki xeiwiyari 'anuyeyeikakaku memikatehayewaniki, kemireuku'uxa miki tukaritsie.

²⁸ Para yunaiti nuiwarite meta nait-sarie kwieyaritetsie meta yunaiti teiteri kiekaritetsie, memaye'eriwaniki memitiwewiwaniki miki tukaritsie xeiwiyari 'anuyeyeikakaku. Miki *Purimi* tukariyari huriyutsixi yamepite'itiwewiwanikekai, memikaheiyehipaniki meta waxiyarima.

²⁹ 'Uka ti'aitame 'Etsitexi 'Awikahiri niweya, huriyu tewiyari Maxirukeyu matia, mektenaka'utiani meteha'aitati hutarieka xapa *Purimi* hetsiemieme.

³⁰ Miki xapa kaneutani'axiani yunaime huriyut-sixi wahetsia xeitsienituyari heimana xeitewiyari heimana 'atahuta kwieyaritsie, 'Atsuheru pitiwa'aitiakai 'aixia 'anekameki meta yuriki haiti,

³¹ *Purimi* 'ixiarariyari mematinenetiwani ki kemi'ane tukariyaritsie, kememaitikatei huriyu tewiyari Maxirukeyu 'uka ti'aitame 'Etsitexi matia, kememitekuxata kai yuhetsiemieme meta yuniwema wahetsiemieme, memiyuhakiekaitsie memuyuhiweriekaitsie meta.

³² Kemitiu'aitaxi 'Etsitexi *Purimi* hetsiemieme, mipai katinaka'utiarieni xapatsie.

10

Maxirukeyu mariwet i kemiratia

¹ Ti'aitame 'Atsuheru tumini kani-warutawawirieni naitsarie mira'aitatsie meta haramara hixiapa kwie miyemanetsie kiekatari memiteyukutuayaniki.

² Naiti Maxirukeyu kemitiu'aitaxi tirikaiyemeki, kemitiuyi xatsikayari 'aye'ati mariwet i kemiratia ti'aitame 'iparewiekaku, naiti kanaka'uka te'aitamete waxapatsie, Meriya meta Peritsiya waxapayaritsie.

³ Huriyu tewiyari Maxirukeyu mariwet i kanayani yuteiterima wahetsiemieme, hutarieka mieme ti'aitame kanayani 'Atsuheru 'utia. Yumiireti 'aixia mekatenixeyakaitini, yuteiterima miwaparewieka minakekaiki 'aixia 'anemeki memu'uwaniki.

**KAKAFYARI NIUKIEYA XAPAYARI
WIXARIKAKI**
**The Holy Bible in the in Huichol language of Mexico,
2020 edition**
**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3